

Վարդենուտ

Մակերես՝ 19.89կմ²

Բնակչություն՝ 852

Գյուղ Ապարանի տարածաշրջանում, Ապարան քաղաքից 9-10 կմ հարավ: Մարզկենտրոնից գտնվում է 16 կմ հեռավորության վրա: Նախկինում ունեցել է Շիրակալա, Շիրադալա, Շիրդալա, Վարդինուտ անվանումները: Վարդենուտ է վերանվանվել 1946թ.:

Գյուղի շրջակայքում գտնվում է 19-րդ դ. կառուցված եկեղեցի, իսկ հարավ-արեւմուտքում՝ պահպանվել են հին ամրոցի հետքեր:

Գյուղը տեղադրված է Արագած լեռան հարավ-արեւելյան լանջին: Գտնվում է ծովի մակարդակից 1900 մ բարձրության վրա: Կլիման բարեխառն լեռնային է: Ձմեռները տեւական են, ցուրտ, հաստատուն ձնածածկույթով: Ամառները տաք են, համեմատաբար խոնավ: Հուլիսյան միջին ջերմաստիճանը տատանվում է 16-18-ի սահմաններում, հունվարյանը՝ -6,-8-ի սահմաններում: Մթնոլորտային տարեկան տեղումների քանակը 450-600 մմ: Բնական լանդշաֆտները սեւահողային տափաստաններ են:

Գյուղի բնակչության նախնիները 1828-29թթ. գաղթել են Պարսկահայաստանի եւ Արեւմտյան Հայաստանի տարբեր շրջաններից: 1831թ.-ին ունեցել է 314, 1897թ.-ին՝ 961, 1939թ.-ին՝ 1172, 1959թ.-ին՝ 756, 1979թ.-ին՝ 699, 1989թ.-ին՝ 696 հայ բնակիչ: Համայնքի բնակչությունը կազմում է 891 մարդ, որից 49% տղամարդիկ են, 51%՝ կանայք: Բնակչության մեջ մինչաշխատունակները կազմում են 31%, աշխատունակները՝ 47%, հետաշխատունակները՝ 22%: Գյուղն ունի 284 տնտեսություն: Ունի դպրոց, գրադարան, բուժկետ, կապի հանգույց:

Համայնքի տնտեսության մասնագիտացման ուղղությունը գյուղատնտեսությունն է:

Գյուղատնտեսական համախառն բերքի մեծ մասը բաժին է ընկնում անասնապահությանը: Զբաղվում են խոշոր եւ մանր եղջերավոր անասնաբուծությամբ: Գյուղատնտեսական հողահանդակների հիմնական մասն օգտագործվում է որպես արոտավայրեր, վարելահողեր, խոտհարքեր: Զբաղվում են երկրագործությամբ, մշակում են բանջարաբուստանային, հացահատիկային, կերային կուլտուրաներ: Պահուստային հողերը զբաղեցնում են համայնքի մակերեսի մոտ 66%, որոնց մեջ մեծ է արոտավայրերի տեսակարար կշիռը՝ 1107հա, որը համայնքի ընդհանուր մակերեսի մոտ 62% է: Վարելահողերը զբաղեցնում են 71հա, խոտհարքերը՝ 9 հա:

Արդյունաբերություն չունի:

Համայնքի հիմնախնդիրների մեջ կարելուրվում է խմելու եւ ոռոգման ջրի ջրագծերի, գյուղամիջյան ճանապարհների վերանորոգումը: